

FERIA QUINTA

In I. Nocturno

De libro Apocalypsis beati Joannis Apostoli.

Lectio I. Cap. 15.

ET vidi aliud signum in cœlo magnum et mirabile, Angelos septem, habentes plagas septem novissimas : quoniam in illis consummata est ira Dei : Et vidi tamquam mare vitreum mixtum igne, et eos qui vicerunt bestiam, et imaginem ejus, et numerum nominis ejus, stantes super mare vitreum, habentes citharas Dei ; et cantantes canticum Moyse servi Dei, et canticum Agni, dicentes : Magna et mirabilia sunt opera tua Domine Deus omnipotens : justæ et veræ sunt viæ tuæ, Rex sæculorum. Quis non timebit te Domine, et magnificabit nomen tuum ? quia solus pius es : quoniam omnes gentes venient, et adorabunt in conspectu tuo, quoniam judicia tua manifesta sunt.

Lectio II.

ET post hæc vidi, et ecce apertum est templum tabernaculi testimonii in cœlo : et exierunt septem Angeli habentes septem plagas de templo, vestiti lino mundo et candido, et præcincti circum pectora zonis aureis. Et unum de quatuor animalibus dedit septem Angelis septem phialas aureas, plenas iracundiæ Dei viventis in sæcula sæculorum. Et impletum est templum fumo à majestate Dei, et de virtute ejus : et nemo poterat introire in templum, donec consummarentur septem plagæ septem Angelorum.

Lectio III.

ET audiivi vocem magnam de templo, dicentem septem Angelis. Ite, effundite septem phialas iræ Dei in terram. Et abiit

primus, et effudit phialam suam in terram : et factum est vulnus sævum et pessimum in homines qui habebant characterem bestię, et in eos qui adoraverunt imaginem ejus. Et secundus Angelus effudit phialam suam in mare, et factus est sanguis tanquam mortui : et omnis anima vivens mortua est in mari. Et tertius effudit phialam suam super flumina, et super fontes aquarum, et factus est sanguis. Et audiivi Angelum aquarum dicentem ; Justus es Domine, qui es et qui eras Sanctus, qui hæc judicasti. Quia sanguinem sanctorum et prophetarum effuderunt et sanguinem ei dedisti bibere : digni enim sunt.

*In secundo Nocturno.**Lectio IV.*

Sermo sancti Augustini Episcopi.
Serm. 63. Cap. 20. de consonantiâ Evangelistarum.

SICUT Maria sine carnali concupiscentiâ Mater, sic Joseph sine carnali commixtione Pater. Nec cum propterea separemus, quia defuit carnalis concupiscentiâ. Major puritas confirmet paternitatem, ne ipsa sancta Maria nos reprehendat. Illa enim nomen suum præponere noluit marito suo ; sed dixit : Pater tuus et ego, dolentes quærebamus te. Non ergo faciant per-versi murmuratores, quod conjux casta non fecit. Numeremus ergo per Joseph : quia sicut castè maritus, sic castè Pater est. Sed præponamus virum femine ordine naturæ et legis Dei. Nam si remoto illo illam constituamus : dicit ille, et rectè dicit : Quare me separatis ? Quare non per me generationes vel ascendunt, vel descendunt ? Andicitur ei : quia tu non genuisti opere carnistuæ ? Sed respondebit : Nunquid et illa opere carnis suæ penerit ?